

## **В ПЯТОК 4-Я СЕДМИЦЫ ВЕЧЕРА.**

На Господи воззвах, поставим стихов 10:

И поем самогласен дважды, и 4 мученичны гласа, и в Минеи 4.

Самогласен, глас 7:

Страстем поработив \* души моя достоинство, скот бых: \* и не могу воззрети к Тебе Вышнему, \* но долу преклонився Христе, \* яко мытарь, молюся зовый Тебе: \* Боже очисти, и спаси мя. [Дважды]

Слава, поконн, Иоанна Дамаскина.

И ныне, Богородичен 1-й, гласа. Вход. Свете тихий:

Прокимен, псалом 79, глас 4: Пасый Израиля вонми, наставляяй яко овча Иосифа.

Стих: Седяй на херувимех явися.

Бытия чтение. [Глава 12, ст. 1 – 7.]

Рече Господь Авраму: изыди от земли твоя, и от рода твоего, и от дому отца твоего, и иди в землю юже ти покажу. И сотворю тя в язык велий, и благословлю тя, и возвеличу имя твое, и будещи благословен. И благословлю благословящия тя, и кленущия тя проклену: и благословятся о тебе вся племена земная. И иде Аврам, якоже глагола ему Господь, и идяше с ним Лот. Аврам же бе лет седмидесяти пяти, егда изыде от [земли] Харран. И поят Аврам Сару жену свою, и Лота сына брата своего, и вся имения своя, елика стяжаша, и всякую душу, юже стяжаша в Харране: и изыдоша поити в землю Ханааню. И пройде Аврам землю в долготу ея, даже до места Сихем до дуба високаго: хананеи же тогда живяху в земли [той]. И явися Господь Авраму, и рече ему: семени твоему дам землю сию. и созда тамо Аврам жертвенник Господу явльшемуся ему.

Прокимен, псалом 80, глас 4: Радуйтесь Богу Помощнику нашему.

Стих: Примите псалом, и дадите тимпан.

Притчей чтение. [Глава 14, ст. 15 – 26.]

Незлюбивый веру емлет всякому словеси: коварный же приходит в раскаяние. Премудр убоявся, уклонится от зла: безумный же на себе надеявся, смешивается со беззаконным. Острояростный без совета творит: муж же мудрый многая терпит. Разделяют безумнии злобу: коварнии же удержат чувство. Поползнутся злии пред благими, и нечестивии послужат пред дверьми праведных. Друзи возненавидят другов убогих: друзи же богатых мнози. Безчестяй убогия, согрешает: милуяй же нищия, блажен. Заблуждающии [неправедницы] делают злая: милость же и истину делают благии. не ведут милости и веры делателие злых милостыни же и веры у делателей благих. Во всяком пекущемся есть изобилие: любосластный же и беспечальный в скудости будет. Венец премудрых богатство их: житие же безумных зло. Избавит от злых душу свидетель верен: разжизает же лживыя лестный. В страсе Господни упование крепости: чадом же своим оставит утверждение [мира].

## **В СУББОТУ 4-Я СЕДМИЦЫ**

### **НА УТРЕНИ:**

Аллилуиа, и тропари, глас 2:

**А**постоли, мученицы и пророцы, \* святителие, преподобнии и праведнии, \* добре подвиг совершившии, \* и веру соблюдашии, \* дерзновение имущии ко Спасу, \* о нас Того яко Блага молити спастися, \* молимся, душам нашим. [Дважды.]

**Слава, мертвен:**

**П**омяни Господи яко Благ рабы Твоя, \* и елика в житии согрешашиа прости: \* никтоже бо безгрешен, \* токмо Ты могий \* и преставленным дати покой.

**И ныне, Богородичен:**

**М**ати Святая \* неизреченнаго Света, \* ангельскими Тя песньми \* почитающе, \* благочестно величаем.

**По 1-м стихословии глаголем седальны мученичны Осмогласника, прилучившагося гласа, три: и Богородичен.**

**По 2-м же стихословии глаголем седален покойн: глас 5:**

**П**окой Спасе наш \* с праведными рабы Твоя, \* и сия всели во дворы Твоя, \* якоже есть писано, \* презирая яко Благ прегрешения их, \* вольная, и невольная, \* и вся яже в ведении и не в ведении Человеколюбче.

**Слава, и ныне: Богородичен:**

**О**т Девы возсиявый миру Христе Боже, \* сыны света Тою показавый, помилуй нас.

**О сих всех указася в мимошедшую субботу. И чтение в Шестодневце.**

**Таже канон Минен, и святого обители, и настояция четверопеснцы по чину их. Четверопеснец, егоже краегранесие: Песнь на мученики, господина Иосифа. И стихословятся песни.**

**Глас 4.**

**Песнь 6.**

**Ирмос: Пучиною житейскою ...,**

**П**реидосте пределы плотския страдалцы многим терпением, претерпевше муки и болезни. Темже всякую болезнь и скорбь облегчаете, вас воспевающих.

**Т**ьмам ангел воинство совокупися святых страстотерпец, и молит Всеблагаго Бога, согрешений тьмочисленных нас избавити, яко Христу угодившии.

**У**мертвився и во гробе Христе уснув, возставил еси мертвыя, и в вере умершим даеши благодати богатство Христе, покой я со всеми святыми.

**Богородичен: Б**ожие Бог Слово, иский обожити человека Чистая, из Тебе воплощается, и земли видится: Егоже непрестанно моли, обрести нам милость во время ответа.

**Иный господина Феодора, глас тойже.**

**Ирмос: Б**урею греховною погружаемь, \* яко во чреве китове содержимь, \* с пророком зову Ти: \* возведи от тли живот мой Господи, \* и спаси мя.

**П**лоти и крове святити не пощадевши, ко всякому мучению стасте небоязненни, Христа не отметающесе: темже с небес низпосла Христос вам венцы.

**М**ученик торжество усрящим, просветившесе детельми, и возопим богодухновенными песньми: вы есте воистинну денницы на земли, Христовы мученицы.

**Троицен:** Троице Святая славолю Тя, Естество безначальное, единого Бога, единого Господа, три Лица, Отца, Сына и Духа: нерожденна, рожденна, исходна, Туюжде и присносущну.

**Богородичен:** О блаженная Богоневесто, како родила еси без мужа, и пребыла еси якоже прежде? Бога бо родила еси, чудо страшное: но моли спастися поющим Тя.

**Стих:** Дивен Бог во святых Своих, Бог Израилев.

**Мученичен:** Усечения удов ваших зряще, насладаетесь кровьми радующесе: но молити о нас прилежно Господа, мученицы приснославнии.

**Стих:** Души их во благих водворятся.

**О**т земли создавый мя, и ожививый мя, и в землю возвратитися мне паки рекый, яже приял еси рабы Твоя упокой, и от тли смертныя возведи Господи.

**Катавасия:** Бурею греховною погружаемь, \* яко во чреве китове содержимь, \* с пророком зову Ти: \* возведи от тли живот мой Господи, \* и спаси мя.

#### Кондак Глас 6:

**С**о святыми упокой, \* Христе, души усопших раб Твоих, \* идеже несть болезнь, \* ни печаль, \* ни воздыхание, \* но жизнь безконечная.

**Икос:** Сам Един еси безсмертный, \* сотворивый и создавый человека: \* земнии убо от земли создахомся, \* и в землю туюжде пойдём, \* якоже повелел еси, \* создавый мя и рекый ми: \* яко земля еси и в землю отыдеши, \* аможе вси человецы пойдём, \* надгробное рыдание \* творяще песнь \* : Аллилуиа.

#### Песнь 7.

**Ирмос:** Образу златому ...,

**О**болкшесе страдальцы в нетление божественное, обнажением тленныя плоти, нас ради плоть от нетленныя Приемшему Жены, ныне предстоите светлии: сего ради мя облецыте во одежду священную обнаженнаго злобою.

**В**оздержанием поживый, страдальческий собор, воздержания нас поприще укрепите теци невозбранно, яко проповедавый Христа на поприщи мужественно, и предстояй престолу венценосный, в наслаждение мысленно со ангелы.

**М**олитвами Боже Твоих святых мученик, усопшия верно рабы Твоя, рая жители покажи, и света мысленнаго сподоби я, непрестанно вопиющия Тебе: благословен Бог отцев наших.

**Богородичен:** Тя едину благую молим Дево, озлобленныя ны ублажи, и прилежно Христа моли естеством суца благаго, воздержания время, благая деющим, исполнити нам поющим Его: благословен Бог отцев наших.

**Иный.**

**Ирмос:** **Глаголавый на горе с Моисеем, \* и образ девства явлей в купине, \* благословен еси Боже отец наших.**

**Возвеличивый** святыя Твоя вся, знаменьми удивив я в мире: благословен еси во веки Господи Боже отец наших.

**Всякий** вид ран прошедше, и колена ваалу не покоршеса преклонити, венцы славы взясте от Бога Христовы мученицы.

**Троицен:** Во Единице Троице, покланяемое Существо, Отче, Сыне и Душе, воспевающия Тя сохраняй, Боже отец наших.

**Богородичен:** Дево Мати Отроковице всесветлая, едина к Богу ходатайство, не престай Владычице молити спастися нам.

**Стих:** **Святым, иже суть на земли Его, удиви Господь:**

**Безсмертному** Царю воинствовавше, и веру к Нему показавше совершенную, кровь свою мученицы за Него излиае.

**Стих:** **Блажени, яже избрал, и приял еси Господи.**

**Идеже** свет Твой жизни истекает, преложи яже преставил еси от временных, верныя Твоя рабы, Господи Боже отец наших.

**Хвалим, благословим, покланяемся Господеви, поюще и превозносяще во вся веки.**

**Катавасия:** **Глаголавый на горе с Моисеем, \* и образ девства явлей в купине, \* благословен еси Боже отец наших.**

**Песнь 8.**

**Ирмос:** **В огни пламеннем ...,**

**Великоименитии** Христовы страдальцы, и честнии в Бозе, вся воспевающия памяти ваша, великих согрешений, и тамошних мук избавите ны, к Нему вашими великими молитвами.

**Святоизбранное** Христа Бога, и твердое воистинну воинство, мученик соборы освятите наш ум и сердце, в сия святыя дни постныя, вашими святыми молитвами.

**Избави** червия мучащаго, и скрежета зубнаго, Господи, и внешния тьмы несветимыя, вся яже верою приял еси: и учини сия, идеже свет лица Твоего Христе, сияет во веки.

**Богородичен:** **Крест** Христов честный, Богородице Чистая, видевшая и от сердца поклонившаяся ны, Твоими ко Владыце сподоби молитвами, видети и страсти честныя, страстей очищенных.

**Иный.**

**Ирмос:** **Земля, и вся яже на ней, \* море и вси источники, \* небеса небес, свет и тьма, мраз и зной, \* сынове человечестии, \* священницы благословите Господа, \* и превозносите Его во веки.**

**О** добраго изменения, имже обретосте смертию живот, священикомученицы Христовы, огня и меча, мраза и зверей никакоже убоявшеся, и вопиюще: пойте Господа, и превозносите во вся веки.

**Горе** лик ангельский, доле же мы земнии, хвалим мученицы Христовы, странная страдания, и подвиги вашего мужества, благословяще, поюще Господа, и превозносяще во вся веки.

**Благословим Отца, и Сына, и Святаго Духа, Господа.**

**Свет, Живот** же и Животы, почитаю Тя Отца, и Сына, и Духа исходна, Естество едино, три Ипостаси, Бога Единого поя, благословлю Тя, пою Тя Господа, и превозношу Тя во вся веки.

**Богородичен:** Кто не воспоеет Тя от земнородных, нескверная Чистая голубица? Ты бо родила еси нам Свет великий, жизни богатство, Иисуса Спаса: Егоже поем хваляще яко Господа, и превозносим во вся веки.

**Стих:** Дивен Бог во святых Своих, Бог Израилев.

**Подвиги** чудныя, мученицы, славяще ваша, благодетеля и Бога благословим и покланяемся, на поприще подвигов вас укрепившаго: Егоже превозносим во вся веки.

**Стих:** Души их во благих водворятся.

**Ты** смерти и живота Господь сый и Бог, преставльшихся благочестно воздвизай, тамо преложи в селениих праведных, благословящих, поющих Тя Господи, и превозносящих во вся веки.

**Катавасия:** Земля, и вся яже на ней, \* море и вси источники, \* небеса небес, свет и тьма, мраз и зной, \* сынове человечести, \* священники благословите Господа, \* и превозносите Его во веки.

### Песнь 9.

**Ирмос:** Яко сотвори Мне ...,

**Светильницы** суще неместнии, Христовы страдальцы, просветите наша помыслы, утвердите творити светозарная и чистая Божия хотения.

**Оружия** зрится закаляющая враги, доблии Христовы страдальцы: но избавите нас от стрел лукаваго предстательства вашими.

**Покой** Щедре в недрах Авраамовых рабы Твоя, верою от нас отшедшия, к Тебе всяческих Зиждителю и Преблагому.

**Богородичен:** Плоти моя умертви движения, Бога плотию Рождшая паче ума, и подаждь просвещение мысли моей, чистый облак сущи света.

### Иный.

**Ирмос:** Величаем вси человеколюбие Твое, \* Христе Спасе наш, \* славо раб Твоих, \* и венче верных, \* возвеличивый память Рождшия Тя.

**Воспеваем** вси памяти ваша, мученицы прехвальнии, подвиги видяще священных ваших страданий, и удивившися Христа величаем.

**Друг** ко другу страждуще глаголаху страсотерпцы: плоти не пощадим, приидите, умрем о Христе, да во вся веки поживем ликующе непрестанно.

**Троицен:** О Троице во едином Естестве, Тя воспевающая, Отче нерожденный, и рожденный Сыне, и Душе исходный, Твоею милостию невредимы соблюди.

**Богородичен:** Радуйся Всечестная Чистая, девства похвало, матерей утверждение, человеков помощи, и мира радости, Марие Мати, и Рабо Бога нашего.

**Стих:** Дивен Бог во святых Своих, Бог Израилев.

**Личе** святых, прими мольбу мою: и яко сподобил мя еси Крест целовати, и спасительней страсти поклонитися мне, Христа молите.

**Стих:** Блажени, яже избрал, и приял еси Господи.

**Ослаби**, остави Щедре, к Тебе Человеколюбцу преставленным, и сих покой в селениих избранных: Ты бо еси Жизнь и Воскресение.

**Катавасия:** Величаем вси человеколюбие Твое, \* Христе Спасе наш, \* славо раб Твоих, \* и венче верных, \* возвеличивый память Рождшия Тя.

**Ексапостиларий:**

**Небо** звездами украсивый яко Бог, и Твоими святыми всю землю просветивый, Содетелю всех поющия Тя спасай.

**Слава:** Живыми и мертвыми обладай яко Бог, упокой Твоя рабы в селениих избранных: аще бо и согрешиха Спасе, но не отступиша от Тебе.

**И ныне:** Сладость ангелов, скорбящих радость, христиан предстательнице, Дево Мати Господня, заступи нас, и избави вечных мук.

**На хвалитех мученичны гласа.**

**На стиховне же подобны господина Феофана.**

## НА ЛИТУРГИИ

Изобразительная. Блаженны Гласа.

По входе тропари:

Апостоли, мученицы и пророцы, \* святители, преподобнии и праведнии, \* добре подвиг совершившии, \* и веру соблюдошии, \* дерзновение имуще ко Спасу, \* о нас Того яко Блага молите, \* молимся, спастися душам нашим.

Помяни Господи яко Благ рабы Твоя, \* и елика в житии согрешиша прости: \* никтоже бо безгрешен, \* токмо Ты могий \* и преставленным дати покой.

Слава: Со святыми упокой, \* Христе, души раб Твоих, \* идеже несть болезнь, \* ни печаль, \* ни воздыхание, \* но жизнь бесконечная.

И ныне, Тебе и стену и пристанище имамы, \* и Молитвенницу благоприятную к Богу. \* Егоже родила еси, Богородице Безневестная, верных спасение.

Прокимен глас 8: Веселитесь о Господе, и радуйтесь, праведнии.

Стих: Блажени, ихже оставишася беззакония и ихже прикришася греси.

Другий глас 6: Души их во благих водворятся.

Апостол, зачало 313. [Евр. 6, 9 – 12.]

Братие, надемся о вас, возлюбленнии, лучших и придержащихся спасения, аще и тако глаголем. Не обидлив бо Бог, забыти дела вашего и труда любви, юже покажете во имя Его, послуживше святым и служаще. Желаем же, да кийждо вас являет тожде тщание ко извещению упования даже до конца, да не лениви будете, но подражатели наследствующих обетования верою и долготерпением.

И за упокой: к Коринфяном, зачало 163. [1 Кор. 15, 47 – 57.]

Братие, первый человек от земли перстен, второй Человек Господь с небесе. Яков перстный, такови и перстнии, и яков небесный, тацы же и небеснии. И якоже облекохомся во образ перстнаго, да облечемся и во образ Небеснаго. Сие же глаголю, братие, яко плоть и кровь Царствия Божия наследити не могут, ниже тление нетления наследует. Се тайну вам глаголю: вси бо не успнем, вси же изменимся. Вскоре, во мгновении ока, в последней трубе: вострубит бо, и мертвии востанут нетленни, и мы изменимся. Подобает бо тленному сему облещися в нетление, и мертвенному сему облещися в бессмертие. Егда же тленное сие облечется в нетление, и смертное сие облечется в бессмертие, тогда будет слово написанное: пожерта бысть смерть победою. Где ти смерте, жало; где ти аде, победа? Жало же смерти грех, сила же греха закон. Богу же благодарение, давшему нам победу Господем нашим Иисус Христом.

Аллилуиа глас 4: Воззваша праведнии, и Господь услыша их, и от всех скорбей их избави их.

Стих: Многи скорби праведным, и от всех их избавит я Господь.

Стих: Блажени, яже избрал, и приял еси Господи.

Евангелие Марка, зачало 31. [Мк. 7, 31 – 37.]

Во время оно, изшед Иисус от предел Тирских и Сидонских, прииде на море Галилейско, между пределы Декапольски. И приведоша к Нему глуха и гугнива, и

моляху Его, да возложит на нѣ руку. И поемь его от народа единого, вложи персты Своя во уши его, и плонув косну его в язык. И возрев на небо, воздохну и глагола ему: еффафа, еже есть разверзися. И абие разверзостя слуха его, и разрешися уза языка его, и глаголаше право. И запрети им, да ни комуже поведят, елико же им Той запрецаше, паче излиха проповедаху. И преизлиха дивляхуся, глаголюще: добре все творит, и глухия творит слышати, и немья глаголати.

**И за упокой, от Иоанна, зачало 16. [Ин. 5, 24 – 30.]**

**Рече** Господь ко пришедшым к Нему иудеем: аминь, аминь глаголю вам, яко слушающыи словесе Моего и верующыи Пославшему Мя имать живот вечный, и на суд не придет, но преидет от смерти в живот. Аминь, аминь глаголю вам, яко грядет час, и ныне есть, егда мертвыи услышат глас Сына Божия и услышавше оживут. Якоже бо Отец имать живот в Себе, тако даде и Сынови живот имети в Себе и область даде Ему и суд творити, яко Сын Человечь есть. Не дивитесь сему, яко грядет час, в оньже вси сущии во гробех услышат глас Сына Божия, и изыдут сотворшии благая в воскресение живота, а сотворшии злая в воскресение суда. Не могу Аз о Себе творити ничесоже. Якоже слышу, сужду, и суд Мой праведен есть, яко не ищю воли Моея, но воли пославшаго Мя Отца.

**Причастен:** Радуйтесь праведнии о Господе:

**Другий:** Блажени, яже избрал и приял еси Господи.